

CONGREGATIO DE CAUSIS SANCTORUM

BRUXELLENSIS seu MECHLINIENSIS

BEATIFICATIONIS et CANONIZATIONIS

SERVAE DEI

ANNAE A IESU

(in saeculo: ANNAE DE LOBERA)

MONIALIS PROFESSAE

ORDINIS CARMELITARUM DISCALCEATORUM

(1545-1621)

DECRETUM SUPER VIRTUTIBUS

“Levabo oculos meos in montes: unde veniet auxilium mihi?
Auxilium meum a Domino, qui fecit caelum et terram” (Ps 121,1-2).

Sanctae Teresiae a Iesu Sanctique Ioannis a Cruce spiritualis
doctrina Servae Dei Annae a Iesu (in saeculo: Annae de Lobera)
interius iter duxit ad virtutum atque consiliorum evangelicorum
perfectionem, scilicet ad montem qui Christus est.

Serva Dei in Hispania, in oppido v.d. *Medina del Campo*, die 25 mensis Novembris anno 1545 nata est. Iam decimo sexto aetatis anno in “communitatem quam maxime rigidam intrare” cupiebat et iuventutis tempore “voluntatem Dei continenter quaerere” statuit. Anno 1570 Carmelum Abulensem Sancti Ioseph ingressa est, ubi novitiarum magistram Sanctam Teresiam a Iesu habuit, quam tres post menses novum monasterium Salmanticae fundaturam secuta est. Sancto Ioanni a Cruce etiam occurrit, qui ei commentarium in “Canticum Spirituale” scripsit. Die 22 mensis Octobris anno 1571 professionem religiosam Salmanticae emisit, ubi novitiarum formationis munus assumpsit. In Baetico oppido v.d. *Beas de Segura* prima Carmeli priorissa fuit et post ei, ut Granatae novum monastrium fundaret, mandatum est. Priorissae munere Matrity fugebatur cum, Sancta Teresia a Iesu aliquot annis ante exstincta, eius reformationis operam defendendam habuit. Ad Summum Pontificem Sixtum V ipsa recurrit, qui anno 1590 breve “Salvatoris nostri” edidit. At sequenti anno, recursu eius inoboedientiae actu existimato, de prioratu deiecta est et in cella sua tres per annos manere conclusa coacta est, addita cotidiana Communionis privatione. Strenuam humilitatem, spem et in Deum fidem demonstravit. Postea Salmanticae priorissa fuit. Ab anno 1604 Gallica monasteria Lutetiae, Pontisarae Divioneque fundavit et ab anno 1607 cetera in Flandria, Bruxellis, Lovanii Montibusque Hannoniae. Has plurimas communitates ducens, precipuas consilii prudentiaeque virtutes ostendit.

Serva Dei omnino Sanctae Teresiae a Iesu vestigia secuta est, cuius primam scriptorum collectionem curavit, et ob Carmelitanam reformationem, quam illa perfecit, multa passa est. Ordinis sui charisma penitus vixit, caritate Christi inflammata et Virginis

Mariae aemula. Contemplatrix animo, fundatricis dotes fructificare valuit ad spiritualis temporis sui Europae restitutionis operam. In adversis haud mediocrem fortitudinem perseverantiamque praestavit et omnes ad solacium et fiduciam excitabat. Bruxellense monasterium tredecim annos rexit, ubi quoque die 4 mensis Martii anno 1621 obiit.

Sanctitatis Fama, qua Serva Dei in vita et post mortem est circumdata, Causa Beatificationis et Canonizationis eius incepta est. Nonnulli Processus Ordinarii instructi sunt apud Curias ecclesiasticas Bruxellensem seu Mechliniensem, Antverpiensem, Tornacensem et alias, qui Romae anno 1636 sunt evulgati. Ab anno 1890 Processus Apostolicus celebratus est. Haec Congregatio decretum de validitate Processuum tam Apostolica quam Ordinaria auctoritate constructorum anno 1904 concessit. Positio, iam anno 1905 edita sed anno 2013 suppleta iterumque impressa, die 14 mensis Novembris anno 2013 Consultorum Historicorum iudicio est subiecta. Igitur consuetas secundum normas an Serva Dei heroico modo virtutes christianas excoluisset disceptatum est. Die 9 mensis Octobris anno 2018 Congressus Peculiaris Consultorum Theologorum faustum votum protulit. Die 5 mensis Novembris anno 2019 Patres Cardinales et Episcopi in Ordinaria Sessione congregati, cui egomet ipse Angelus Cardinalis Becciu praefui, Servam Dei virtutes theologales, cardinales iisque adnexas heroum in modum exercuisse professi sunt.

Facta demum de hisce omnibus rebus Summo Pontifici Francisco per subscriptum Cardinalem Praefectum accurata relatione, Sanctitas Sua, vota Congregationis de Causis Sanctorum excipiens rataque habens, hodierno die declaravit: *Constare de virtutibus theologalibus Fide, Spe et Caritate tum in Deum tum in*

proximum, necnon de cardinalibus Prudentia, Iustitia, Temperantia et Fortitudine iisque adnexis in gradu heroico Servae Dei Annae a Iesu (in saeculo: Annae de Lobera), Monialis Professae Ordinis Carmelitarum Descalceatorum, in casu et ad effectum de quo agitur.

Hoc autem decretum publici iuris fieri et in acta Congregationis de Causis Sanctorum Summus Pontifex referri mandavit.

Datum Romae, die 28 mensis Novembris a.D. 2019.



Becciu

ANGELUS Card. BECCIU

Praefectus

+ *Marcellus Bartolucci*

✠ MARCELLUS BARTOLUCCI

Archiep. tit. Mevaniensis

a Secretis